

四庫全書

史部

欽定四庫全書

史部

山西通志卷一百五十二

詳校官給事中臣王鍾健

檢討臣德生覆勘

總校官進士臣朱鈐

校對官編修臣盧遜

謄錄監生臣施華

欽定四庫全書

山西通志卷一百五十二

列女

四

潞安府

長治縣

戰國

趙奢妻括之母也趙王以趙括為將代廉頗其母上書言於王曰括不可使將王曰何以對曰始妾事其父

時為將身所奉飯飲而進食者以十數所友者以百數大王及宗室所賞賜者盡以予軍吏士大夫受命之日不問家事今括一旦為將東向而朝軍吏無敢仰視之者王所賜金帛歸藏於家而日視便利田宅可買者買之王以為何如其父父子異心願王勿遣王曰母置之吾已決矣括母因曰王終遣之即有如不稱妾得無隨坐乎王許諾趙括既代廉頗悉更約束易置軍吏秦將白起聞之縱奇兵佯敗走而絕其

糧道分斷其軍為二士卒離心四十餘日軍餓趙括
出銳卒自搏戰秦軍射殺趙括括軍敗數十萬之衆
遂降秦秦悉阡之趙前後所亡凡四十五萬明年秦
兵遂圍邯鄲歲餘幾不得脫賴楚魏諸侯來救乃得
解邯鄲之圍趙王亦以括母先言竟不誅也

鮑宣妻桓氏之女字少君宣嘗就少君父學父奇其清
苦以女妻之裝送貨賄甚盛宣不悅謂妻曰少君生
富驕習美飾而吾寔貧賤不可當禮妻曰大人以先

生脩德守約故使賤妾侍執巾櫛既奉承君子惟命
是從宣笑曰能如是是吾志也妻乃悉歸侍御服飾
更著短布裳與宣共挽鹿車歸鄉里拜姑禮畢提甕
出汲脩行婦道鄉邦稱之宣哀帝時官至司隸校尉
子永建武初為魯郡太守永子昱從容問少君曰太
夫人寧復識挽鹿車時不對曰先姑有言存不忘亡
安不忘危吾焉敢忘乎

隋

陸讓母馮氏者上黨人性仁愛有母儀讓即其孽子也
開皇末為播州刺史數有聚斂贓貨狼藉為司馬所
奏案覆得實將就刑馮氏蓬頭垢面詣朝堂數讓罪
於是流涕嗚咽親持盃粥勸讓食既而上表求哀辭
情甚切帝愍然為之改容獻皇后甚竒其意致請於
上書侍御史柳彧進曰馮氏母德之至有感行路如
或戮之何以為勸上於是集京城士庶於朱雀門遣
舍人宣詔曰馮氏以嫡母之德足為世範慈愛之道

義感人神特宜矜免用獎風俗讓可減死除名復下
詔褒美之賜物五百段集命婦與馮相識以旌寵異

唐

李氏邯鄲人李嚴女潞州幕張谷納為侍人號新聲當
劉從諫潛圖窺脅新聲諫谷曰始天子以從諫為節
度非有野戰攻城之功直以其父挈齊十二州還天
子去就間未能奪其嗣耳自有潞澤未聞以一縷一
蹄為天子壽左右皆無賴章武朝數鎮顛覆皆雄才

傑器尚不能固天子恩況從諫擢自兒女手中不以
法得亦宜以不法終君當脫族西去大丈夫勿顧一
飯恩以骨肉腥健兒食言訖悲涕谷不決者三月恐
言泄縊之未幾劉正拒命其下王協等殺正及谷並
夷其族

宋

李氏翰林學士吳育之弟婦駙馬都尉李遵勗妹寡不
更嫁御史唐詢因怨育遂奏育不使嫁欲用此誣李

氏自盡

元

程宅妻武氏潞州人夫亡守節不二至元二年旌表平
章政事李魏公益書額曰門旌程宅武氏高年耆德
牛贊妻張氏潞州人年十七歸贊二十二夫亡子一遺
腹生一女遭兵燹產盡攜子女歸依父母父母哀之
令改適矢死不從壽八十七而卒觀風者錄其行詔
立石於墓表之

明

鎮國將軍朱詮鉅繼室王氏義門端之女贈光祿卿佐之妹七歲失恃于歸後相鎮國敬以承志儉以治家嘗以不及事舅姑為恨當祭祀夔夔如也撫前夫人女不啻所生及鎮國捐館終身御縞素絕慶弔不禮賓不精食更嚴於內範子婦謁見先教以孝弟經史次之著有女範十篇傳誦於世

千戶張英妻王氏英平荊襄戰死朝命護喪歸諭祭葬

王迎柩觸殯復甦既葬哭於墓道淚盡繼以血哀毀而死

庠生張子明妻王氏年二十一夫暴卒王痛哭即縊死
柩側

趙敬妻牛氏年二十二夫亡子鉉未週歲誓不再適撫
子補郡諸生尋亦卒苦節四十八年弘治間奏表

廩生盧清妻吳氏清父母客臨洛相繼沒清貧甚不能
歸葬詣彼封墳守之課徒自給居二年復之汴以疾

卒吳聞訃痛絕歎曰吾舅姑委骨於北良人殞命於南天乎何毒痛至此乃寄幼孤於女兄鬻女為道路費抵臨洺號於野值前徒指以瘞處因得收二骸歸復入汴負夫骨還至河水漲不能渡遇其姻商彼者佐之以渡而三喪乃畢葬先兆矣學正劉崧言於州守馬暉出俸金贖其女仍厚恤之

監生宿昭妻儀賓政之母黃氏年二十六昭亡矢殉姻戚以養老育孤勗之氏斥鉛綺稱未亡人治生業功

苦服艱不遺於力朝夕奉養曲盡其禮舅姑安之忘其子亡宿氏業益振子政能讀父書以克家稱弘治間旌表太史賈詠為之傳劉文安公龍撰貞節錄序昭弟瑤亦早卒妻王氏守節有嫂氏風

李紀妻毛氏紀守臨洮時何驛丞子景明方十歲紀夫婦大奇之育於室紀執詩書毛執燈燭晝夜課景明讀愛撫逾已子後景明登第官副使為有明一代詩人之冠

雄山四貞正德辛未歲盜起齊魯鼓行而西無慮數千
百抵潞境西火鎮刼掠財物搜獵婦女四女傑然出
乎其間投馬大罵剔目斷臂而死者趙公賢女悶兒
也仆地被拽膚裂血流道路朱殷罵而被殺者焦相
妻程氏也不受甘言之誘怒目大罵與程同殺者袁
佩女鷹菊也被驅遇井自謂得死所抱幼女投死者
王川妻平氏也寇退聞其事詔旌為四貞建祠於雄
山南命春秋致祭見劉文安公龍貞烈倡和序

周景妻王氏景及父誌胥客死鄆縣王年二十四聞訃
痛幾絕拮据迎二喪歸葬長子倫甫數歲次子備方
在娠撫成括遺貲使治商家遂裕性好施煖食以飼
丐者尤肅於內政子孫稟命如嚴君守節四十餘年
以壽終

典膳栗木妻陳氏木早卒遺孤永爵甫三歲永祿未週
姑李祖姑韓俱衰老孀居氏仰事俯育憂勞曲盡嘉
靖庚子二子同舉於鄉甲辰永祿登進士事聞詔旌

為三節之門陳氏累贈至夫人

庠生閻誠妻程氏誠應省試輿疾歸自度不起謂氏曰
為我善事父母死且無憾氏泣曰舅姑有兄嫂在君
脫不幸妾願從地下誠卒遂自縊

焦鈞妻原氏鄭林繼妻姬氏夫亡俱自縊以殉

程天佑妻劉氏天佑病傾簪珥市醫藥比卒哀痛絕飲
食九日不死潛自縊

義媼贈光祿任環僕婦也環守太倉統兵征倭出海上

倭乘間攻城急內人約投井死媼請先體肥塞井口
不能上下環至圍解問內人胥圍井泣因啟覽出媼
眷屬得生

梅守釗妻楊氏瀋陽衛人少孀守節三十年有司旌之
指揮薛朝印妻劉氏年十九朝印死於陣號泣將自縊
顧遺姪四月不可使夫無嗣後生男奎長襲父職志
行無玷士人賦詩美之

栗繼芳繼室任氏磁州人嫁甫八月夫亡有同里進士

尹長子欲娶之任曰為栗氏婦即為栗氏鬼萬一更迫命盡今日矣事遂寢撫前子嚴慈並濟卒令有成守節四十餘年而卒

生員劉珽妻張氏早寡食貧課子宸舉正德己卯鄉試赴禮闈卒於道妻戴痛子幼姑老勉稱未亡人撫子學顏為郡廩生旋亦卒顏妻張氏哀毀而死張與戴胥守數十年以壽終

焦貞女東阿主簿焦鉦女字李曉將娶而曉卒女欲臨

其喪父母不許縊於室幾死母因偕往哭盡哀姑牛氏老且盲女願留養曲盡孝敬姑常曰即兒在承歡當不加於婦也姑復目明如初人謂孝感所致事聞旌表壽八十九終其女姪適袁近禮夫亡亦守志不二殆焦家之教有素歟

郝淮妻孔氏初淮存時有友寄白金數百於淮淮沒或勸弗與氏正色曰不義之行寧不玷夫於地下耶悉召還之氏年二十八而寡撫繼英有成壽八十而卒

原文會妻宋氏嫁未期夫亡遺腹生子常守節六十餘
年巡按旌其門

李貞女庠生李日達女字雲和中尉理園未婚而夫卒
女年十七臨喪哀甚持服三年畢僻處一室屏絕鉛
華舅姑給衣食擇菲薄者受之事聞建坊旌表壽五
十八歲卒

郭明妻宋氏夫亡遺子二苦志撫孤長紀娶馮氏次繕
娶張氏相繼俱寡二氏協志養姑馮有子鑑張無子

共撫成之

璩可大妻郭氏年十七歸可大不二載而寡子女俱無
食貧守節壽九十有一

周再燦妻賈氏年二十夫亡子女無出矢志不二壽七
十終

程氏三烈程宗道之女舉人程于藩之妹一適本縣賈
名卿一適壺關張斗熙一適本縣周基邠崇禎五年
流賊肆掠父率三女避土洞中賊至圍洞縱火匿者

竄出賊牽張婦載馬上投地大罵賊怒殺之賈婦倒
投溷溷死周婦墮崖不死復於野自經

程萬里妻袁氏萬里被賊殺袁抱幼子暨二女趨赴井
長女徘徊氏推入之轉顧幼者已逸去氏即抱子自
沈死

朱綱妻賈氏被賊掠欲污之大罵不屈賊縱火氏投烈
焰而死

趙惟徵妻秦氏惟徵子學會妻璩氏賊迫秦不屈截其

十指俱斷投火死據投窖中賊擊以石死

張門三烈袁氏庠生張于京母李氏于京妻又李氏于
正妻于京堂嫂也孀居遭壬申之亂袁攜二李避趙
家莊土洞中賊搜獲袁罵賊立殺之繫京妻於馬項
不從馳馬曳死繫正妻於店大罵投火死司李袁嘉
其姑婦貞烈給銀收瘞之

省祭宋體道妻郭氏崇禎壬午寇至同居諸婦皆羅拜
郭匿塹垣坐地不跪賊怒詰之郭瞪目厲聲曰老婦

跪亦死不跪亦死已安排不活矣延頸受刃至死猶含糊罵賊不絕

庠生杜良材妻侯氏任賊破蘇店執氏索金帛氏給賊曰可隨我至瘞金處行及井遂墜入死之

庠生靳愈光妻王氏任賊之亂氏攜一女二子避杜氏岑樓內聞夫遇害泣曰無主矣忍為賊擄乎時女已及笄先叱入井氏即從之二幼子亦號泣隨母俱下比出屍母女猶相抱云

劉守倉妻韓氏賊執守倉將殺之氏奔救伏守倉身哀
懇曰寧殺我毋殺夫賊殺韓并殺守倉

延慶知州程應登繼妻韓氏及笄歸程撫前子女不啻
己出兩從宦遊以清白相其夫應登卒哭而絕者數
四殯虞之後坐卧一小樓供應登像朝夕蔬果必奠
不奠不食也三十餘年未嘗少輟壽七十六卒

兵部尚書程正己妻朱氏賦性端方于歸後操井臼勤
紡績克供婦職正己弱冠成進士任顯要氏略無貴

倨容正已忤璫禍且不測氏曰與楊左諸君同難又何愧也正已抱疾五年侍奉甚至及捐館幾不欲生稱未亡人者三十載婦儀母德為時推重翰林李中白銘其墓

南通州知州栗永馨側室郭氏敬謹周密綜理諸務巨細咸愜永馨意及永馨夫婦相繼沒家事裨益一身氏區畫井井撫兩子淑瑞延師督課俾得成名氏子女無出年二十一孀居苦節五十年至七十而卒

潘裕王側妃趙氏甲申閩變將入宮妃投井死孝廉胡
守德輓以詩有誰知正氣在香閨落落丈夫弗如也
之句

王氏梁家莊人逸其夫姓氏夫亡無子豫製一棺以矢
志崇禎十三年大祲鬻棺自給餘米數升畀土人鑿
夫穴生入其中即令掩覆聞者哀之

璩森妻高氏王鏜妻李氏袁汴妻張氏李德化妻王氏
王世光妻賈氏生員任汝賢妻吳氏潞州衛百戶王

榮妻武氏生員魏文淵妻王氏原江妻郭氏鮑鳳妻
王氏江椿妻栗氏江紹祖妻趙氏王聚良妻馬氏庠
生仇渙妻李氏蘇勲妻阮氏典膳李餘妻崔氏蘇時
中妻常氏蘇時和妻李氏庠生潘桂妻王氏以上俱
守志節

國朝

庠生程嶠妻王氏年二十一夫亡絕粒矢殉姑曲諭而
止紡績治生計事畜之餘悉以繕家廟宗黨賢之康

熙三十四年建坊旌表

庠生胡夢吉妻宋氏年十九夫亡撫孤琮列庠序守節五十載康熙五十一年建坊旌表

楊相妻田氏年二十夫亡事姑撫子守節四十餘年雍正元年建坊旌表

庠生李璐妻粟氏年十九夫亡撫六月孤守志歷三十五年雍正四年建坊旌表

宋之翼妻趙氏年十九夫亡撫子守節歷四十一年雍正

正四年疏請旌表

武生崔靜妻孫氏年二十五夫亡守節育子壽八十餘
雍正五年建坊旌表

劉安妻申氏年二十六夫亡以事育為己任無何翁姑
沒兩子繼亡前後辦五喪撫四孤壽九十有三雍正
五年疏請旌表

牛化龍妻張氏年十九夫亡矢守貞節雍正六年疏請
旌表

郭鈞妻李氏及笄適鈞舅姑已沒事伯姑婉變柔順得其懽心年十九夫亡矢守撫遺腹子澂列庠食餼雍正五年建坊旌表

宋近臣妻田氏年十七姑卧病命氏取菜於圃隣人李悅尾而戲其後氏泣且罵悅直前強之罵益厲迫以利刃屹不為動詈罵如初悅因手刺焉氏死七日事敗露論悅如法雍正五年疏請旌表

庠生申嘉行妻程氏姜賊變氏與一子三女胥為賊繫

引至安城營伍中氏挽三女同墜營旁井中死後月
餘踪跡得之凡汲十二屍而氏屍出衣衫浥瀾顏面
如生

貢生楊大任妻宋氏盜踵其門長女已及笄一子尚幼
氏攜子女同入井死

庠生任憲妻李氏避盜關壁村為賊所獲據地求死賊
遂殺之

庠生郭永寧妻彭氏姜逆變隨永寧避馬家寨賊攻亟

永寧謂之曰盍行乎氏曰去將焉往不如先君一死
竟自縊

貢生景光大妻李氏姜逆之變光大遇害氏謂其子星
曰婦女被擄而死棄骸道路非禮也可穿穴井中匿
一我後賊用火熬遂破面流血變形投繯死

申周翰妻朱氏盜至夫被掠姑投井氏亦從之又杜大
壯妻張氏避盜破城村夫被殺氏觸石而亡朱翰垣
繼妻阮氏避亂針漳村寇迫同夫墜井死

生員吳大勲妻李氏避亂潞城南社村大勲死氏哀號數絕親隣慰之氏曰吾志祈速死耳越日縊於寢通判程尚勤副室晉氏年二十五夫亡守節撫孤正緒領戊子鄉薦第一氏享永年

武生程正學繼妻張氏夫亡矢守大司馬澂源憫其志以二子之玠嗣之守節三十餘年卒

廉高遷妻朱氏年十八夫亡無子女家貧如洗氏勵節事親歷三十四年卒

張師孔繼妻王氏夫亡姑老氏縫紉資養撫前子紀恩
勤備至壽七十七卒

生員任之櫛妻張氏早寡撫遺孤五人有成歷四十餘
年卒

李遂妻杜氏年二十八而寡守節撫孤孀居五十五年
巡按旌之

貢生姚天向妻田氏夫卒無子家素貧氏勤苦守志年
逾八十猶績縷無間

王氏前副使張克儉妻克儉監軍襄陽抗節殉城氏孀居無子姜賊之變避難故縣土洞中賊攻垂破氏曰我命婦也義不受辱投懸崖死

監生馬宛妾李氏性柔順事嫡牛氏雍睦無忤牛遭疾李祝天求代疾篤李竊語人曰我死母自愈也遂自縊牛聞之一慟亦亡

沈國昌妻王氏有孝行姑疾篤氏斷指沸湯和藥以進姑病尋愈

蘇婦袁氏少寡撫孤成立娶賈氏子尋卒賈殉夫自縊
姑婦節烈鄉黨稱之

武女劉妻賈氏生長寒門賦性貞潔淫僧往來其家見
賈少艾與其姑潛圖之始誘以利繼迫以威賈拒不
從竟死非命紳士白其事於邑宰淫僧置法而氏節
遂著

趙克光妻鄭氏夫亡撫孤雛維寧食餼於庠孫青州司
馬良璧太平令良玉弱齡喪母亦胥氏撫成守節四

十九年享壽七十有一

庾盛菜妻李氏庠生張運昌妻花氏李養田妻王氏韓
貴松妻白氏王之琦妻常氏原維康妻武氏李相國
妻李氏張顯妻原氏秦光榮妻晉氏監生程塏妻張
氏趙旺才妻蕭氏賈忠謀妻王氏武進士鄭之賓妻
李氏李福妻鄭氏韓烈妻璩氏王翼妻劉氏王弼妻
張氏庠生霍文封妻賈氏蕭可順妻鮑氏王廷輔妻
宋氏劉希賢妻崔氏庠生戴天澤妻任氏宋國寧妻

郭氏董諫誠妻陳氏庠生胡涵妻趙氏子胡廷梅妻
王氏邵沆妻王氏趙增慶妻范氏郭敬妻張氏李芬
妻李氏崔抱珠妻胡氏崔光先妻王氏李潤枚妻賀
氏舉人任昌言妻溫氏劉忻妻路氏于光顯妻梁氏
郝自興妻郭氏黃萬妻郭氏秦國政妻李氏李光亮
妻牛氏路英妻李氏張璿妻李氏宋學禮妻張氏庠
生杜祺齡繼妻牛氏屈三寶妻劉氏庠生郭維翰妻
宋氏劉正發妻馮氏張申寬妻楊氏李功勳妻姬氏

韓桂蘭妻姜氏李進祿妻馮氏郝正己妻劉氏杜一
發妻王氏胡士儒妻璩氏劉國安妻陳氏李振妻張
氏周際泰妻李氏崔萬鎰妻王氏顧乃猷妻李氏趙
文秀妻李氏王自增妻萬氏郭養龍妻曹氏賈載之
妻李氏郭嘉全妻原氏許光明妻原氏申德強妻陳
氏王迎祥妻潘氏賈連妻孟氏李鐸妻苗氏庠生黃
秉正妻趙氏靳尚母王氏盧三瑾妻崔氏秦斌妻王
氏武名弼妻馬氏監生郃沛妻陳氏璩好裕妻劉氏

賀珍妻陳氏武三坤妻牛氏孟崑妻宋氏李樸妻王氏宋普妻李氏以上俱守志節

長子縣

晉

楊氏故苻秦后也慕容永篡位於長子願以為上夫人楊氏引劍刺之為永所殺

明

吳子寧妻李氏年二十三夫亡無子守節終身建文二

年詔旌貞節

索經妻闕氏年二十五夫亡守節五十年撫二子進祿
世祿成立詔旌

閻宗魯妻郭氏年二十夫亡遺子世卿甫七月撫孤砥
學世卿以明經官博士

兗州推官陳天爵繼妻潘氏天爵居官清素比卒囊橐
蕭然氏甘貧荼苦撫族子為嗣守節三十年而終

韓卿妻高氏夫早亡子德萃亦夭高與子婦胡氏食貧

守志機杼相對不夜分不止歲時伏臘號泣之聲徹
於道路有司旌其雙節

原瑞妻侯氏字君正瑞亡君正長號頓地眦裂出血明
日忽聲咽不出家人走視僵立頰頸死血淚漬柩不
滅

鎮原知縣張美繼妻馮氏年二十夫亡無出欲從死以
救免課前子問明力學萬歷己卯舉於鄉

張臻妻崔氏夫亡撫子子亡撫孫孀居垂七十年書香

世繼邑中以為美談

吳守謙妻王氏年十八夫亡時方娠越三月舉子尚質
守節撫孤畢生如一

高思純妻孔氏早寡遺孤甫五月撫養成立充郡庠生
守節四十餘年奉詔旌表

楊烈女字穿羅庠生學程女年十四未適人崇禎七年
為流寇所執誘以珠帛不顧迫以刀鋸不懼至刺腹
斷背女仍罵不輟賊怒解其屍父學程見女死觸堦

罵賊亦遇害

阮夢鳳妻王氏年十八夫亡撫子守節二十餘年值甲

申闖變投井死

生員任肯堂妻劉氏崇禎間被寇掠大罵不屈賊斷其
左股罵愈厲賊碎其頭死而復甦時抱娠越三月生
男任相事繼母以孝聞

生員王銓妻馮氏高嶽妻馬氏王三策妻潘氏生員劉
世科妻任氏任道管妻索氏陳大玉妻張氏李進明

妻程氏生員馬承恩妻劉氏以上俱守志節

國朝

趙龍鱗妻李氏姜賊之變避難西山路遇遊騎將劫之
去氏罵不絕口賊怒裂屍剖心死

舉人馮景星妻曹氏生員范鵬程妻李氏姜賊之變被
執俱不屈赴井死

修武令范士偉妻高氏孀居數載盜起攜幼女字生員
趙完城者同赴井死

銀工郭顯魁妻衛氏年二十六魁亡誓不再適子幼家貧茆茨無依卒以饑寒死

庠生張克勤妻鮑氏克儉妻馬氏俱少寡鮑以次子嗣馬後紹祖姑崔氏遺媼妯娌交勵志節以終

趙烈女小字興梅農民趙民順女幼字同里周根辛未合卺而根辛卒訃聞興梅欲臨其喪父母弗許遂涕泣絕食得間自縊於樓署縣事劉芳猷勒石表其墓曰烈女趙興梅墓

生員楊煥妻馮氏崔宗義繼妻陳氏裴宗器妻連氏曹
紱妻王氏王永慶妻鮑氏典史梁鳴鳳繼妻王氏醫
官田時興妻羅氏廩生鮑盤妻李氏生員馬秉貞妻
鮑氏吏目常用妻衛氏裴光裕妻孫氏栗鳳鳴妻常
氏生員曹綬妻馮氏李大賢妻楊氏胡昇妻牛氏生
員賈希顏妻李氏生員趙士俊妻鮑氏監生趙士英
妻牛氏生員李趨庭妻馬氏生員韓澄心妻高氏生
員宋三俊妻衛氏儀賓趙俊傑繼妻張氏生員趙文

英妻牛氏監生趙文英妻王氏孟承光妻張氏張嘉
德妻苗氏生員李廷樞妻劉氏郭顯奎妻衛氏廩生
曹履新妻楊氏高車妻田氏生員牛鳴時妻申氏栗
德妻楊氏劉淑聲妻張氏以上俱守志節

屯留縣

南齊

鮑令暉照之妹也照有大雷岸與妹書詩品齊鮑令暉
歌詩往往嶄絕清巧擬古尤勝惟百願靡矣照嘗答

孝武云臣妹才自亞于左芬臣才不及太沖爾

明

王廷秀妻張氏年十七適王越二年夫遘疾臨危氏謂夫曰爾母我虞我必爾從也遂潛赴後園自縊

李朝卿妻郭氏年二十夫亡事親撫子誓不易節子之茂中嘉靖庚子鄉試事聞詔旌

生員張承輔妻段氏年二十一夫亡無子撫族姪應奎守節直指史齊歲給粟布旌之

馮邦器妻鄭氏年十九夫亡無子遺一女及笄亦夭
筑孤苦盡瘁事姑事聞詔旌其閭

申福妻李氏子文興妻常氏孫良妻李氏胥年二十有
奇而寡撫孤守志三世同操李以徒手傭織奉兩姑
人尤難之

李梗妻張氏梗吏壺關邁疾卒氏易衣飾具棺歸葬時
年二十有四紡績課子子尋夭孤苦勵操人咸重之
監生申所見妻李氏年二十三夫卒子宏才宏道俱幼

撫孤二十年宏道復夭婦姚氏年十七永矢不二李
嘆曰吾夫夭吾子又夭薄德之致也爰是恤孤賑寡
宗黨之不能婚娶葬埋者傾貲助之厥後宏才領己
酉鄉薦咸謂苦節種德之報萬厯間詔旌

生員李楠妻王氏夫歿無子女茹苦勵操歲饑富人嘉
其節周以粟氏正色拒曰吾孀婦何以受此卒却之
聞者欽嘆壽九十五終

生員暴所學妻李氏生員暴所性妻郭氏妯娒胥少寡

誓不二天撫子成立並詔旌表

馮王擢妻常氏年二十夫亡里中少年悅其色願娶之
氏挾利刃自矢曰吾頭可斷此志不可奪卒完節享
壽終萬厯間旌表

舉人王弼妻郭氏年二十一夫卒時有豪貴求婚氏叱
曰吾夫弱冠成名不幸早逝妾雖無子誓不辱夫求
者慚而退

王文淵妻楊氏年十九生子肝未期夫沒育肝成立娶

韓氏年二十四生子堯聘肝以吏卒於京韓扶柩歸
葬事姑終身無忤堯聘娶霍氏早卒霍亦矢守不替
邑以三節稱

申周屏妻霍氏年二十夫亡無子女形影自憐冰檠畢
世當事獎之

生員徐一耀妻李氏年二十五夫亡子陞甫歲繼姑欲
奪其志氏號泣願與子俱死姑意遂寢當道歲給花
布旌獎

人為將亡人矣家人不為意夫殮畢氏引刀自刎而死

生員劉禧妻段氏年二十夫亡從容殮夫畢至夜自縊
兩柩並列於庭柩下忽產靈芝草二莖鄉黨傳為異
事

生員李珙妻張氏年十八珙亡子鍾岳甫二歲張引刀
刺面堅志不奪壽七十五卒珙弟李珽妻鄭氏年十

五歸珽閔七月珽亡誓不他適足跡不履戶庭鄉黨
以雙節稱

李道隆妻楊氏苗隆妻王氏宋朝臣妻韓氏趙雲鵬妻
郭氏劉一清妻李氏張龕妻宋氏李席珍妻馮氏李
成章妻陳氏以上俱守志節

國朝

庠生孫家彥妻李氏年二十三家彥病革子奇蘭俱幼
家彥囑兩兄晰產各撫其子蓋慮氏志之不堅也氏

曰君胡不諒我耶家彥沒矢節課子奇以拔貢授寧海令蘭為歲貢生壽八十一而終

申餘銀妻李氏年二十七夫故明季盜起負姑竄徙十數年無寧晷姑卒無恙子一契撫成列邑庠

苗世莊妻申氏年二十三夫亡哀毀幾不欲生所親責以存祀氏守節撫子而終

舉人張景行妻楊氏生員鄭之明妻宋氏生員馮珩妻趙氏原武令李如梧妻鄭氏庠生霍嗣周妻尹氏宋

桂妻楊氏陳洪恩妻蘇氏以上俱守志節

襄垣縣

元

皇甫慶妻張氏年二十慶卒以死自誓守節不渝至正

五年旌表

史諒妻趙氏于歸二載諒卒貧無所倚攜孤惠居父母所父母諷改適趙曰我忍死至今特以邈孤欲存宗祀之一綫耳如以獸行汚我當即引繩自縊父母知

不可奪止之惠生子嗣宗甫二歲惠卒妻楊氏守志
如姑克昌厥後為不忝家範云

明

師克己妻李氏年二十餘夫亡遺一子紡績自給守節
五十餘年洪武間詔旌

劉濂妻衛氏年二十夫亡氏恪修婦道事姑至孝事聞
詔旌編修張治撰節婦碑

生員李高妻路氏年二十五夫亡舅姑欲嫁之氏誓死

不變長子牙登鄉薦年九十以壽終

張伊智妻韓氏生而貞靜明慧叔治教授諸生說詩至
柏舟韓從帳後聽曰為人婦不幸不當如是耶治大
奇之及笄適伊智年二十四伊智卒內外無倚有里
中少年欲娶者韓截所韜髮示之乃已家素貧日夜
辟蠶食子女痛兒以貧故失學兒出服役於官輒哭
又恐兒聞傷其心還輒輟哭面之韓未寡前二載父
母遣車來迎心動謝弗往會寇闌入塞闔室俱殲韓

徒跣求父母屍吮血而碧葬焉邑令旌其節孝少保
劉龍撰誌銘

庠生崔濟妻常氏年二十七夫亡豪家有強婚者氏自
縊救甦剪髮訴之當事卒全其志

崔瑄妻趙氏年二十一夫亡撫子守節壽九十六卒

監生王永芳妻崔氏年二十二夫亡撫子守節壽九十

三卒

郝華妻李氏少寡撫子思仁長娶栗氏生一子不育思

仁尋卒栗矢死靡他事姑垂三十年姑沒負土封墓
不櫛髮不如葷哀毀終喪直指旌其門曰姑婦雙貞
王應春妻趙氏年十六適應春春以貧窮縊死氏年二
十三哀痛矢殉潛引刀自刎姑張氏哭而謂之曰而
翁早逝我嘗懷此志以而夫幼未果今吾婦成之吾
無憾矣當道旌之

郝自省妻郝氏族無賴某逼污不從自刎死有司以聞
建坊旌表

申承文妻侯氏宗禎六年為流寇所執厲罵不屈賊立
殺之

庠生邢宗齊妻張氏流寇至一門被執張紿賊曰若釋
我翁夫我當汝從賊果釋之翁夫去既遠張奮罵曰
我士人婦豈從賊耶抱幼子投深溝死

國朝

生員李名閔妻鄭氏年十九夫亡矢死或紿之曰墓封
未百日不敢啟爾縱死不與而夫同穴也氏諾旋有

求婚者氏曰過百日可也及期浣衣沐浴墓祭其夫
奠畢旋繞塚傍從者先行氏挽髮纏頸挂樹枝而死
陳烈女父柱早故許字李壘家貧母欲敗盟女不能違
乘間自縊死

姚士前妻苗氏夫亡氏擗踊長號曰夫死奚以生為遂
赴井死

陳烈女字珍姐陳三星之妹也許聘李希言之義子其
希言子不材三星議改婚於郝女聞自縊死

李小更妻粟氏年十八完婚甫九日小更就食河南十載不返翁姑憫其少詭言小更死冀絕其念令轉適氏號泣不食竟自縊

趙韓璽妻楊氏年十八夫亡撫遺腹子散祚弱冠列庠序未幾子夭撫孫孫沒更撫曾孫疊罹凶慘閭里哀之

趙之璽妻王氏少寡姑李氏哭子喪明醫藥罔效氏舌舐四年姑目復明鄉里稱為貞孝

郝二妻盧氏年二十夫亡無子女家赤貧砥志守節壽七十餘

邱果妻苗氏年二十四夫亡無翁姑無子女孑身荼苦壽八十七卒族人胥敬憐之具棺禮葬

高文秀妻侯氏歲病疫翁故夫亡一月相繼死者六人氏年二十三匍匐辦喪葬苦守志節終始弗渝

趙雲梯妻崔氏馮景成妻趙氏李之平妻趙氏庠生趙顯宗妻王氏曹運利妻李氏白崇雅妻韓氏王士明

妻郝氏栗嵐妻黃氏常玘妻翟氏解柳妻張氏王道
亨妻傅氏韓琛妻陳氏庠生李名濂妻郝氏李振翼
妻姚氏宋士俊妻郝氏郝誥妻韓氏張朱妻李氏庠
生賈燦繼妻趙氏劉聲芳妻邱氏鄭敦仁妻邱氏庠
生王聘妻張氏生員趙運世妻秦氏楊增梁妻武氏
郭應明妻李氏李鍾白妻郭氏廩生郭皇圖妻李氏
子維京妻崔氏增生李茂生妻馮氏增生鄭為仁妻
劉氏知州賈待旌妻趙氏以上俱守志節

潞城縣

明

史廣妻朱氏年二十七夫亡遺子甫二歲矢守貞節成
化六年旌表

李芳妻宋氏年二十五夫亡子祿甫五歲昭甫二歲撫
育有成守節三十年成化六年旌表

生員馬負書妻張氏年二十夫亡遺孤甫期礪志守節
其後父罹青羊之變氏哀痛切心目雙瞽子鏜晨昏

禱天目忽復明享壽八旬卒鏜任學博見孝行

秦鍾妻王氏年二十四夫亡食貧守志訓子邦寵成立
凡三十餘年卒

趙志道妻賈氏少寡守節訓子貞元列黌序當道旌之
歲貢王民化妻孫氏年二十一夫亡矢志堅貞撫孤恭
已成名壽七十三卒

國朝

申本妻孫氏少寡守志養姑三十餘年子增松妻李氏

孀節如其姑訓子紹宗為邑諸生

王發馨妻史氏年二十三夫故無子家徒壁立守節三十五年冰操有如一曰

生員曹錦妻梁氏年二十夫故遺一女姑年逾六旬氏盡力孝養一節終身

廩生江達妻申氏廩生王允中妻秦氏秦鳳儀妻李氏
申崇德妻王氏王紉妻崔氏閻必中妻王氏監生侯
晉錫妻武氏廩生王建功妻汪氏申璜妻段氏武生

秦洛妻劉氏以上俱守志節

黎城縣

周

黎莊公夫人衛侯女也既往而不同欲所務者異未嘗
得見其傅母閔夫人之賢公反不納憐其失意又恐
其已見遣而不以時去謂夫人曰夫婦之道有義則
合無義則去今不得意胡不去乎乃賦詩曰式微式
微胡不歸夫人曰婦人之道一而已矣彼雖不吾以

吾何可以離於婦道乎乃賦詩曰微君之故胡為乎
中露終執貞一不違婦道以俟君命漢劉歆作頌曰
黎莊夫人執行不衰莊公不偶行節乃垂傳母勸去
作詩式微夫人守一終不肯歸又贊曰去歸之義夫
人豈昧不改之節猶為當遂傳母不情式微何為中
露之詩君子乃序

宋

武時妻宇文氏宇文光女早寡靖康末金兵陷黎大肆

劫掠兵將脅污之氏曰我儒家女名門婦肯受辱於
汝耶即墜井死氏父光亦以是日死難

明

劉志純妻段氏年二十一而寡勵志守貞孝慈克盡年
六十餘卒成化三年詔旌

靳正妻王氏年二十夫亡守節終身成化六年旌表

季麟妻王氏年二十三夫亡守節無玷成化六年旌表

庠生李信妻韓氏韓洪妻楊氏俱早寡守節始終如一

有司上其事詔旌

庠生李芬妻劉氏芬貧依從祖居病篤無子有幼女二
囑氏攜女別適氏且悲且憤誓以死從芬卒殮畢遂
扃戶自盡

生員韓魏妻王氏年十八夫故號痛絕粒死

王尚志妻張氏年十九而寡撫子汝學娶張氏年十六
亦寡方保姪越月舉子國忻兩孀茹苦撫孤成列邑
庠未幾國忻亦卒妻趙氏年二十一從兩姑守志邑

稱世節

李嘉妻崔氏宗禎甲戌流賊掠長寧氏被繫蓬首垢面
詈罵不屈賊強披以綺繡載之馬上臨絕險而墮賊
怒碎挫之

王氏失其夫姓氏王進業女年二十夫亡翁姑強之嫁
氏不從潛出赴河死

李佩玉妻王氏年十七夫亡時母方病氏語婢曰老母
事完當求我所母沒遂不食而死

王俊士妻李氏貢生李宰女俊士性跣地見疾於繼母
父逐之母嗔不釋復送之官繫獄逼氏改適氏泣踊
不從多方營救卒不獲解氏曰夫無生妾奚忍獨生
遂先夫自縊時年一十有六

王世榮妻孫氏王廷詔妻靳氏唐麟妻王氏庠生韓永
寧妻李氏韓楚母李氏妻楊氏廩生王行讓妻高氏
廩生高忠士妻王氏廩生王國祚妻徐氏王進業妻
劉氏庠生高可仰妻史氏妾劉氏高鳳鳴妻李氏庠

生王珠妻李氏庠生李養性繼妻王氏王嗣榮妻胡氏王嗣賢妻師氏王嗣隆妻李氏靳文魁妻張氏祝永疆妻周氏庠生王承寵妻郭氏以上俱守志節

國朝

庠生高碧雯妻李氏夫亡矢志撫子成立康熙五十九年建坊旌表

庠生韓杜妻張氏妾宋氏夫亡並勵貞操畢生如一庠生李養純妻王氏夫亡守志事病翁十年無怠容壽

七旬卒子占黃以孝聞

申本正妻李氏子國相妻靳氏胥少寡撫孤守志鄉里
稱為雙節之門

主事李甲黃副室馬氏代州人年十五歸李知書識大
義甲黃病矢死乞從葬甲黃心許之康熙丙午冬甲
黃卒於官氏隨柩歸里既葬越丁未九月氏語其母
曰兒死今日恐遺夫子有婦人從死之名也母聞驚
遽方慰之氏疾墜樓死時年二十一歲嫡子馥爰啟

父穴而祔焉閔其志也

劉才妻石氏才貧甚茶苦操作奉姑無間言才病篤與氏訣曰我死擇勝我者事之氏嘿然才歿三日乘間投井死邑令鄧文詔表其墓曰烈婦石氏之墓

庠生李深妻趙氏深以受誣憤恚死氏號泣不絕聲不食數日死之

李進貞妻王氏年二十一夫亡欲殉者再家人阻之夫既葬托言飼蠶遂入室自縊

壺關縣

唐

張延賞夫人苗氏宰相苗晉卿女延賞累代台鉉為女
擇婿莫有入其意者夫人有朗鑑特選韋臯以為必
貴既就婚臯性度高曠不拘小節延賞悔之至不齒
禮一門婢僕漸見輕侮夫人待之常厚而抱不平臯
妻泣曰韋郎七尺軀學兼文武豈有沈滯於茲為尊
卑見誚而虛擲光陰乎臯乃辭去後權隴右軍事德

宗幸奉天西面之功獨居其上帝旋自金吾持節西
川以代延賞詭名韓翔去城三十里有報延賞者曰
代相公韋臯非韓翔也夫人曰是必韋郎延賞笑曰
天下同姓名何限彼韋生應已委棄溝壑安能秉吾
位乎夫人曰韋郎昔雖貧賤氣凌霄漢以不屈媚相
公因而見尤成事立功必此人也次早入州延賞憂
愧曰吾不識人遂潛去臯待夫人過於布素時

元

王宣妻郭氏王為壺關甲族四世同爨宣提領本州稅課時以能稱宣沒郭守節四十年宣從弟宇從姪英俱早逝宇妻李氏守節五十年英妻李氏守節四十年胥以壽終一門三節縣尹郅朗上其事於中書免徭役加優恤翰林國史院編修趙天麟為之志

王天祐妻劉氏將沒囑其婦曰我不幸早逝汝善事我母訓我子毋貽我羞劉曰夫天也言不可負既寡啜粥面墨衣布簪荆事育無愆學正楊雲為撰賢孝碑

明

王觀妻程氏年十九夫亡遺孤昇平甫期持喪三年每詣夫塋輒悲號幾絕終身紡績以養舅姑洪武二十九年旌表

生員楊昱妻呂氏昱卒呂自縊以殉嘉靖十二年詔旌閭閻妻張氏年二十一夫亡遺子節撫訓成立尋亦卒苦守撫孫巡按陳表其閭

生員郭恢妻張氏少寡守節三十年內外無間言奏聞

旌之

牛進寶妻杜氏年二十四夫故苦節六十年壽八十
五卒萬厯四十一年詔旌

姬守節妻郭氏節早卒矢志終身萬厯四十二年詔旌
韓天民妻李氏年二十五夫亡撫子之屏娶婦牛氏閱
四載之屏亦亡牛從姑守志撫孤成立

生員張朱妻王氏歸朱二載夫沒遺子一孀居二十餘
年崇禎壬申身罹賊鋒怒罵不屈死

張斗熙妻程氏崇禎壬申偕姊適賈者妹適周者避難
於縣南高家陀賊鋒四警三氏知不免張摠衣覆面
墮巖下身首俱碎賈投廁周投繯胥死難焉

牛相妻路氏馬漢妻程氏平齊妻張氏平朔妻張氏楊
準妻李氏生員閻鉅妻宋氏陳設妻萬氏陳志高妻
吳氏郭江妻宋氏梁欽妻劉氏吳棟妻王氏監生宋
洽妻秦氏張弛妻楊氏秦一卿妻李氏庠生陳霆妻
常氏以上俱守志節

國朝

劉加義妻向氏劉加廷妻牛氏姜瓖之變二氏俱被執
同聲詈罵賊露刃脅之二氏延頸掠髮夷然就戮賊
遂殺之月餘收其屍形骸不毀通判牛倬弔以詩曰
露冷風寒泣暮蛩哀猿啼處弔芳踪雙魂不逐鉛華
落縹渺東山第一峯

皇甫德妻晉氏年十八避盜紅嶺寇攻急矢不辱身夫
婦預相訣寇至果遇害

生員姬屏周妻牛氏年十九夫亡守節歷三十餘載撫
子升元列賢序

吳璉妻宋氏夫亡哀慟幾絕越日投井死

庠生秦孕昌妻郭氏庠生馬聞仁妻楊氏王德能妻申
氏張令教妻王氏庠生段耀妻李氏雷起璧妻崔氏
郭世全妻岳氏以上俱守志節

平順縣

明

李輝妻党氏年二十一夫亡子倫甫一歲矢死守志歷五十五年成化間詔旌

曹汝桐妻郭氏年十七夫亡遺姪生子鵬撫成尋亦卒又撫孤孫壽七十二卒奉詔旌表

生員郭應曾妻曹氏年十七夫故守志終身當事旌云貞貫金石節軼古今

史載德妻張氏年二十四夫亡守節五十餘年

生員張隆母王氏妻張氏崇禎五年流寇破城被擄不

屈同遇害

生員馬負書妻張氏年二十一夫亡訓子鏜由歲貢任教諭年八十餘卒

國朝

王帝禪妻張氏年二十夫故事親撫子守節四十七年
雍正八年疏請旌表

石崑玉妻李氏年二十一夫亡遺子二長鼎新次鼎臣
撫訓甫成相繼沒鼎臣妻王氏時年二十食貧撫子

貞操婉美其姑

王榕妻舒氏子孕生妻申氏胥早寡苦志撫孤婦姑一轍

王加節妻閻氏年二十夫亡撫孤克明尋卒復撫孫閻省苦守五十餘年卒

劉攀桂妻任氏年二十四夫遭疾氏泣謂隣嫗曰夫脫不諱吾年少無子奚以生為攀桂卒含殮畢氏投崖死生員石鼎象妻張氏廩生王象辰妻耿氏王親臣妻馬

氏生員秦殿掄妻趙氏生員常天眷妻任氏申繼儒
妻柳氏王亨妻崔氏王增福妻王氏王緒妻陳氏石
鳳廷妻楊氏以上俱守志節

山西通志卷一百五十二

欽定四庫全書

山西通志卷一百五十三

列女

五

汾州府

汾陽縣

元

姜鳳舉妻皇甫氏天性淑慎歸姜後恪盡婦道夫亡或勸之再醮泣曰禽鳥且有死不再配者奈何人不如

烏撫育遺孤一節終老泰定間旌表

明

郭世玉妻陳氏年二十夫亡子從魯甫週歲事舅姑撫
幼子孀居七十年兩遇兵燹全節無虧洪武間旌表
李桂妻蘇氏千戶謝德妻王氏田訥妻郭氏劉鎧妻段
氏樊鶴妻任氏常保妻田氏俱少寡守節建坊旌表
劉景博妻矯氏孀居五十年足不踰閭限紡績課子雲
漢業儒任寧夏學訓導知府安鵬奏表其門

鎮國中尉朱知煥妻賀氏封淑人中尉疾賀欲先死以
殉取瀕一勺咽之左右方救奪賀曰瀕毒入臟腑無
可救理即可救我必死遂絕飲食竟與知煥同時卒
慶成王表樂為奏聞禮官按典無旌命婦例世宗特
命旌之謚曰貞烈

鎮國將軍朱奇漆妻王氏少寡守節奉姑六十餘年壽
登八十餘逮見孫曾四世嘉靖三十九年賜勅遣行
人梅惟和詣第旌表

生員田一蘭妻張氏年二十八夫亡無子孀居四十年
清節凜然

王蜀妻侯氏年二十一夫亡抱骸慟哭欲自裁家人防
守甚謹潛吞毒即日死奏請旌表

鎮國將軍朱敏濤妻賈氏年二十五將軍歿矢志從死
衆慰止之朝夕號慟不百日哀毀死

生員賈店妻王氏夫亡自刎幾斃晝夜號泣而死

田伯松妻朱氏伯松早亡翁姑亦逝伯松幼弟未期氏

撫成娶婦尋亦卒遺子田芳育為己嗣訓讀成名巡撫扁曰三世維風歲給穀二石布一疋

朱新堞妻盧氏妾薛氏馮氏新堞晉恭王七世孫家汾州崇禎十四年由宗貢生任中部知縣會賊入關傳檄至新堞方巡城怒而碎之議拒守誓必死三氏請先自盡許之有女方數歲新堞拊其背而勉之縊左右皆泣下

慶成王審臚妃武氏生時室有異光長而端淑甫笄歸

審處理內政居豐守約宮闈肅然崇禎癸未冬杪逆
闖渡河次于蒲坂妃聞之蓬垢不事櫛沐宮媼問故
妃曰天之所壞人不能支我待死而已既而賊至將
入府妃踉蹌投井死闖大索宮中兩日不得十閱月
始出其屍面猶如生

李茂才妻劉氏避賊崖窟賊索之急茂才見殺氏枕屍
大慟賊擁上馬投地奮罵脅諸婦羅勸罵益甚賊怒
揮刃碎其屍

舉人常祐妻謝氏李金榮妻吳氏蔚大賢妻郭氏韓秀妻謝氏張大化妻原氏田贈妻武氏生員賀時泰妻賈氏以上俱守志節

國朝

生員張君遴妻朱氏少寡截髮矢志撫孤懋勸成名守節五十年康熙十六年建坊旌表

李之桂妻田氏年二十三夫亡孝養翁姑喪葬盡禮孤緒甫生撫訓為知名士苦守三十餘年康熙四十九

年疏請旌表

杜根芽妻李氏貧家婦也夏月採蕨於山有李大成者
先在山巔招之曰是可取也氏從而上旋入深林大
成顧無人逼之氏不從擊以石復斫以鋤既死棄屍
溝渠滅其迹初隣人雷打差兒見氏入至是久不出
迹而求之突遇大成倉遑失據打差兒詰得其狀歸
語氏夫購屍訟之官康熙四十九年大成伏誅氏

詔旌

雷龍騰妻齊氏龍騰早亡時值收穫晨興詣場圃強暴
趙之福犯以非禮氏持挺格鬪趙擊以石傷而仆地
詈曰吾寧死不受辱也力躍而起趙復以亂石擊之
罵不絕口而死事旋敗露趙棄市康熙五十五年建
坊旌表

董科妻高氏年二十五夫故遺姪得男撫之守志姜瓖
之變避難肅靜村小竇溝中遊騎數輩踪跡得之氏
大罵不屈遂遇害雍正七年建坊旌表

史廉妻崔氏廉遊宣府死客邸計聞痛絕復甦忍死為
搬喪計迨夫柩抵里氏曰吾心事畢矣即於是晚自
縊

侯孝女字秀姑侯明亮女歲荒食盡母呂氏將溺井女
號泣隨其後挽救不及亦躍入從之時年十四歲郡
人至今名其井為孝女井

義官李春陽妻田氏呂韶妻朱氏王國藩妻高氏武時
旦妻趙氏李廷樞妻張氏常懋文妻王氏監生韓衍

卒母閻氏監生張寅愷妻李氏以上俱守志節

平遙縣

宋

劉氏平遙侯延廣乳母延廣初在襁褓中遭王景崇之難劉氏以己子代延廣死而行丐抱持延廣至汴還其祖益人尤義之

明

生員相仲禮妻于氏夫亡刺一目以矢志姑邢氏年八

旬子保甫三歲事親撫幼終始不渝有司奏聞旌表
三孝女姓趙氏父母年高鮮兄弟三女願侍養膏不欲
適人孝謹曲至雖丈夫子不是過也親歿三女躬負
土築墳高三十尺周圍二畝餘女各植柏一株至正
德間夜有盜樹者樹將斷斧聲徹村墟二十里鄉人
競異之今尚存栢一株咸呼為孝女墳云

生員李華妻矯氏少寡翁姑俱八十餘子憲生甫十月
氏事育盡道冰操不渝弘治間旌表

李辨妻梁氏夫早亡子頤未期守節課子頤領鄉薦官
郡丞事母稱孝有司奏請旌表

李得海妻郭氏隆慶元年寇犯境氏攜女出亡被執賊
欲污之氏厲聲曰寧碎身而死不辱身而生遂遇害
女間道歸具道其詳訓導程文表其墓

王廷明妻李氏隆慶之變氏夫婦攜幼女將如城避兵
離里許賊兵突至欲掠之去氏抱女堅不釋賊殺女
并殺夫氏枕屍痛哭奮罵不屈賊並殺之

蘇士學妻李氏年十九夫亡長子繼在抱次子續方娠氏事親撫子苦節六十年奏請旌表

毛世武妻鞏氏夫出亡里中兒以褻語嘗之氏厲言大罵竟為所殺直指康某以貞烈表其門

溫登魁妻梁氏年十九夫亡撫子守節姑強之嫁氏刀墮三指以示志姑意寢卒完節以壽終

任建妻溫氏生員梁士豪妻田氏王胡妻郝氏知縣梁楨妻曹氏妾閭氏邵良臣妻張氏李蘭妻劉氏石廷

學妻任氏雷三畏妻郝氏以上俱守志節

國朝

梁進傑妻楊氏年二十九夫故守節三十一年事姑盡孝撫子有成康熙四十年建坊旌表

張國儒妻梁氏姜賊變為盜所掠不屈死之

貢生李冠楠妻劉氏被賊執毀形自廢不食而死

楊正芳妻張氏夫死于兵守志不移壽九十終

米騰芳妻任氏年十七騰芳没氏食貧守志垂六十餘

年卒

梁植妻雷氏年二十一夫亡無子父母欲奪其志氏曰禽獸之行誓不為也卒全其節年五十八終

雷騰雨妻郝氏年二十七夫亡守節六十餘年卒事瞽姑尤謹鄉里稱賢

王尚威妻張氏年二十夫亡守節撫兩世孤壽九十七終

侯新命妻張氏年二十夫亡遺娠舉子苦志撫守年八

十餘

生員高鼎甲妻孟氏早孀守節事衰翁姑孝撫孤集成
成名

郭維斗妻侯氏早寡守節五十六年壽八十三卒子爾
安官守備封太恭人

劉氏小字梅兒劉汝德女姿容端麗夫無行投人為奴
逼令偕往梅兒號泣累日夜半母問之梅兒曰兒意
已決次晨當行啓戶視之竟自縊

劉裕正妻郝氏庠生梁澤妻雷氏增生梁勉妻劉氏喬
汝樟妻毛氏陰貴斗妻李氏耿崇宰妻李氏朱光俊
妻梁氏王益興妻朱氏趙加印妻李氏張順言妻侯
氏李三元妻冀氏裴一榮妻閻氏楊玉茂妻侯氏劉
祥妻池氏薛友貴母賈氏王國重妻范氏輩自英妻
趙氏閻毓太妻趙氏冀州偉妻梁氏武生劉翼妻武
氏庠生薛廷瑤妻劉氏薛豫妻梁氏侯秉才妻安氏
孟千惠妻范氏武舉安爾甸繼妻王氏姚潤生妻李

氏田士英母母氏霍登縣妻張氏劉良弼母郭氏武
進士郭爾安母侯氏梁建鼎母宋氏以上俱守志節
介休縣

晉

賈渾妻宗氏渾為介休令劉元海將喬晞陷城死之宗
氏有姿色晞欲納之宗氏罵曰屠販奴豈有害人之
夫而欲加無禮於爾安乎何不從殺我因仰天大哭
晞遂害之時年二十餘

明

文整妻李氏年二十三夫亡守節撫子正統十一年詔旌

羅維妻宋氏年十八夫亡生子甫三月哀毀逾情堅守志節有司以聞成化二十三年旌表

宋彬妻羅氏年二十一夫亡家貧紡績自給志行無玷嘉靖七年詔旌

李廷保妻秦氏年十八夫亡家貧勤紡織茹糟糠冰霜

矢志有諷之嫁者扶面毀容以叱之歷年九十終

郭朝臣妻羅氏年二十三育一女夫病篤謂氏曰爾年少我死盍嫁諸氏泣曰妾不忍聞此妾之義有死無二及夫疾大漸氏曰不可為矣遂自縊翌日夫亦死王附學妻梁氏年二十五夫亡孝事舅姑撫育孤幼壽九十五而終嘉靖四十二年旌表

宋尚志妻文氏年二十一夫亡守節撫孤天啟間奉詔旌表

郭宗妻王氏有姿容惡少豔之薄暮宗往囑問惡少潛入逼汚氏厲聲呼隣里惡少逸去夫還語以故誓必死曰我身雖未辱誰與白者竟自縊巡按院劉移檄撰碣表墓

王天福妻梁氏天福病噎氏焚香祝天願與偕死及夫没付家事於兒婦食杏仁死

庠生張翼儒妻閻氏甲申之變恐被辱自縊死

喬士恩妻郭氏王睿妻鈕氏鴻臚寺寺丞王嘉璋妻趙

氏以上俱守志節

國朝

監生郭天宜妻張氏年十九夫亡奉姑育子歷數十年
康熙五十六年建坊旌表

劉讓繼妻張氏年十五適劉越四載讓卒氏撫孤守志
壽九十而終子翊聖登壬辰進士官司李

侯懋功妻賈氏年十九夫客死雲中櫬將至往母氏訣
曰我恐不勝喪姑嫂相遇甚善無相疑也歸即飲毒

姑力救之氏曰無庸吾志決矣邑宰封牲躬祭其門
左陞正妻孟氏陞正不慧家且貧舅姑勸氏改適氏曰
夫不才命也執婦道惟謹未幾夫歿哭泣盡哀苦節
以終

喬千仞妻江氏夫亡姑繼沒翁病癱氏躬滌穢惡未嘗
有難色母董氏老疾無子迎翁養於母家晨夕侍奉
翁與母無異母逝葬畢仍迎翁歸凡十有二年翁卒
千仞從兄歿遺孤方幼氏鞠養如子不令從母適鄉

黨賢之

梁應陸妻侯氏董奕榮妻任氏董奕茂妻宋氏茹英芳
妻任氏孟光輝妻李氏王志會妻李氏張士芬妻岳
氏子維安妻孟氏以上俱守志節

生員張國瑄妻趙氏早孀撫兩世遺孤訓孫大磐大礪
成名

孝義縣

三國

張氏字昌蒲太原茲氏人太傅定陵成侯鍾繇之夫人也世長吏二千石夫人少喪父母充成侯家修身正行非禮不動為上下所稱述貴妾孫氏攝嫡專家心害其賢數讒毀無所不至孫氏辨博有智巧言足以飾非成過然竟不能傷也及妊娠愈更嫉妬乃置藥食中夫人中食覺而吐之瞑眩者數日或曰何不向公言之荅曰嫡庶相害破家危國古今以為鑒誠假如公信我衆誰能明其事彼以心度我謂我必言固

將先我事由彼發顧不快耶遂稱疾不見孫氏果謂
成侯曰妾欲其得男故飲以得男之藥反謂毒之成
侯曰得男藥佳事闇於食中與人非人情也遂訊侍
者具服孫氏由是得罪出成侯問夫人何能不言夫
人言其故成侯大驚益以此賢之黃初六年生會恩
寵愈隆成侯既出孫氏更納正嫡賈氏

明

任全繼妻王氏年二十夫亡無出前室子文約甫三歲

撫如已出迄於成立年二十六卒孫女二一適劉公
順一適李頤胥少寡守志始終弗渝其得于氏之教
者深矣

吳全妻張氏年二十夫亡矢守竭力養姑有以貧諷者
即面斥之不與更見姑卒以困苦終其身

監生田賦妻霍氏賦有孝行以憂母病卒霍慟曰吾夫
死而吾獨存耶縊喪次家人救免嚴伺之賦既葬乘
間卒自經賦弟貢先賦沒妻吳氏亦以節稱

楊大仁妻張氏大仁多從匪類遊氏美姿容有曹姓者
嘗至大仁室習見之久蓄異志會氏歸寧乃要於廣
仁寺後之壞垣給曰而夫在此欲有語也未入垣即
牽衣戲之氏力拒極口詈罵曹忿甚格殺之

庠生任希閔妻趙氏年十九夫亡事舅姑甚謹撫孤朝
宗底於成任睢州判官嘉靖間詔旌

鄆縣令馬廷華妻王氏廷華卒子復殤氏為夫樹坊表
易產業又出粧奩佐之曰夫既無後庶藉此以傳於

世知縣胡表其門

辛門妻傅氏教諭相之孫女夫為兵所殺氏投崖殉之
任克已妻孫氏兵掠其家氏扶姑伏草中兵先殺姑脅
從之氏罵不絕聲復以刀斫其髮氏意不少怯兵知
不可奪刃其腹而死

任自脩妻程氏流寇橫發掠氏室欲污之氏不屈觸壁
而死

武烈女庠生有昇女字柏氏子未嫁而柏氏子夭女誓

不再字會有強委禽者女聞入密室自縊奉詔旌表
舉人孫章妻李氏呂鉞妻韓氏庠生張荷妻王氏庠生
史宗王妻孫氏拔貢張正志妻任氏以上俱守志節
國朝

生員張講妻秦氏夫亡矢死閉幽室廢飲食哀毀逾情
年餘而卒

李守忠妻梁氏守忠被壓死氏號泣三晝夜自縊以殉
武開國妻霍氏早寡事嚴姑曲承意旨撫孤成立以節

壽終

庠生梁可傳妻雷氏年十六夫亡子眉生未晬食貧孀
守一節不渝

庠生梁鳴鶴妻雷氏少寡無子撫姪為嗣守節以終
尚聖仁妻張氏年十九夫亡子國典未百日有勸之他
適者輒面斥之國典娶周氏未幾亦歿周年二十歲
從姑守志清節無瑕

蘇達春妻郭氏楊耀妻任氏廩生李榮春妻任氏張文

章妻周氏廩生王希華妻蘇氏生員程履亨妻田氏
生員田公元妻任氏張調妻劉氏馬天林妻張氏以
上俱守志節

臨縣

明

生員冀善妻嚴氏年二十夫亡子甫二歲父母令轉適
氏曰吾為士人妻豈效醜婦行以自玷耶奉翁姑撫
幼子閨門肅然壽八十五歲卒建坊旌表

韋太妻李氏太早卒誓不再醮教子成立官州判弘治二年奉詔旌表

武勉仁妻高氏年二十一夫亡子績甫歲氏苦志守節訓子成名御史齊旌曰貞節

喬廷瑞妻高氏年二十四夫卒哀慟欲絕令匠人斲棺大其制置櫬鎖鑰悉以畀姑曰發喪惚遽中恐不及檢點也姑信之至晚氏乃自縊

王廷佑妻郝氏年二十三夫亡垢面蓬首永蘖終身御

史桂立坊旌之

知州郭有為妻任氏子孔亨妻白氏孫肯構妻高氏三世孀居節操如一當道旌曰三節流光

趙從東妻劉氏年二十七夫亡無子所親諷之嫁不從繼姪環為嗣環無行廢產殆盡氏曰此天之困我也針黹自給志行益堅壽八十六卒

袁汝器妻穆氏夫亡無子矢志守節翁天保潛受郝養志聘氏覺自縊邑令申請旌獎給賞祭葬

高孕舜妻郭氏年二十四夫亡姑亦以痛子繼歿氏拮据兩喪憂勞垂斃有叔姑欲奪其志氏矢死撫二子讀書成立節壽終身

賀寧邦妻賈氏聞流寇破城攜幼女投井中死

郭增妻高氏城破自經死

高烈女父汝賢年未笄賊執之載馬上女跳躍詈罵墜地者數四賊怒斫死之

歲貢郝孔照妻陳氏流賊陷城氏登城倒墜死

樊節妻劉氏為流賊所掠守義不屈罵賊死

王大賢妻薛氏子王三聘妻郭氏賀承惠妻陳氏生員
郝有成妻崔氏生員殷福妻郭氏劉慎體妻韓氏以
上俱守志節

國朝

李萬年妻張氏年二十二夫亡孝事翁姑撫子思豫列
明經壽八十一終

庠生趙本妻白氏夫卒誓不獨生乘間自縊

王爾牲妻薛氏年二十四夫亡子女俱無氏晝夜悲悼
絕粒而死

李登第妻薛氏夫客豫章絕音問氏紡績養翁姑喪葬
胥盡禮登第卒不返孤苦以終

高之翰妻武氏郝昌祚妻蘇氏劉見龍妻李氏庠生侯
象震妻穆氏趙倬城妻蘇氏高雲路妻成氏庠生白
晉侃妻趙氏白編妻張氏王自明妻申氏康靖寬妻
劉氏劉增榮妻郭氏問某妻高氏生員賀美錦母王

氏高自茂妻苗氏李思謙妻曹氏張琳祖母李氏母
曹氏生員郭衛京妻高氏生員李琮妻賀氏張五美
妻郭氏子人龍妻郭氏李喬生妻高氏趙嶠妻曹氏
趙靜妻白氏監生趙驥妻張氏以上俱守志節

石樓縣

明

庠生鄭維賢妻孫氏年二十五夫亡甘貧守節卒年七
十有二旌表祠祀

生員王珙妻鄭氏歸珙未踰年珙卒杜門守節事姑甚
謹孀居九載姑沒有欲奪其志者氏嘆曰吾之不死
以有姑也今姑死何以生為遂自縊有司以貞節聞
生員李元浚妻賀氏孀居守志撫孤有成

知縣許諭妻王氏夫亡持貞潔始終無議

任自立妻許氏崇禎五年閩賊破城氏正色罵賊墜城
死子起家妻趙氏亦不屈死之當道表曰一門雙烈
張法聖妻李氏年十八夫亡孀居二十餘年會閩逆變

投井死

賀應元妻劉氏年二十夫亡遺孤光祖未期苦節撫孤
奏請旌表

國朝

生員王維翰妻鄭氏夫亡撫子子尋卒艱貞勿失當事
旌之

永寧縣

宋

郝戡妻聶氏戡篤行苦節隱居不仕有語氏使勸之氏曰吾不德無以助君子敢強所不願以累其高哉

明

生員阮福妻梁氏年二十夫亡即縊以殉有司奏聞旌表
張璞妻李氏年二十三夫亡事翁姑以孝聞訓子成立
守節四十餘年有司奏旌狀元呂柟為之記

生員閻文淳妻王氏年十九夫亡遺幼女二家貧矢志
守節終始如一享壽八十一歲奏聞旌表

安勲妻白氏嘉靖辛丑寇亂氏從夫匿土穴寇攻急令夫逸去罵賊不屈身被十餘創死

牛宗近妻李氏夫婦俱被執氏以身蔽夫曰寧殺我毋殺夫賊並殺之

侯景儒妻吳氏賊至走避山洞中賊烽四起知不免乃棄兒投水賊急挽之載馬上氏刺面怒罵遂受害

典膳張環妻李氏張蘭妻馮氏俱孀居守志罵賊被殺又喬甫妻郭氏亦以不屈死

賀女年十七未適人從父匿山谷為賊所獲強行不從
賊支解之

溫女年十六與母俱被掠女仆地不起罵不絕口賊怒
斷其頭以去烈婦白氏等八口胥嘉靖辛丑年事也
士寅奏聞並詔旌表

生員張鏐妻崔氏夫亡無子守節五十餘年奏旌

生員車煜妻張氏年十九夫亡無出夜即自縊奏旌

張珊妻王氏年二十夫亡舅姑在堂生盡養死盡葬年

逾七十志行無愆奏旌

副使胡汝輔妾鄭氏幼貞靜言笑不苟汝輔遘疾氏籲天願代疾革先自盡有司表其門

生員車坦妻胡氏年二十五夫亡孀居守志境彌苦節彌堅奏旌

副使喬應光妻蘇氏生員車同軌妻喬氏隆慶元年城陷俱赴井死都御史楊並請旌表

石州巡檢劉祐妻董氏祐任邱縣人秩滿同子治起文

省會適石州陷董氏與女挽髮環抱投井死治婦為
幼子所牽遂被掠祐聞變趨歸莫得家人所在會治
婦乘間逃回語其狀始縋井出之母女抱如故當事
義之為治殮給驛歸葬

石州之變殺掠殊慘自縊投井者廟宇井坎所在
皆滿署同知李春芳為收男女各瘞一大塚得旌
者惟蘇喬數人其湮沒不傳者不知凡幾茲得之
任邱節婦傳志之

張鉗妻王氏年十九夫亡無子誓不他適孀居四十餘年家人弟侄亦罕接其容有司旌其貞節

崔婦王氏惟春女其夫弟誘污之氏不從自縊巡按立烈婦碑以表之云質清冰玉節勁松筠明嫌惡辱死不愧心蚩蚩夫弟那知人倫一日投繯千古名馨

崔烈婦有福妻也甲申之變為賊將田虎所執大罵不屈與子同時見殺

張煥妻梁氏王廷弼妻張氏夫亡俱守志節

國朝

生員張素妻邢氏素死甲申難氏年二十餘守節教子
曙中乙榜景膺歲薦壽八十有五卒康熙二十三年
疏請旌表

庠生王國隆妻高氏年二十七夫故子世清甫五歲矢
守志節年六十八而終康熙四十四年建坊旌表

白琦妻蕭氏營兵石二逼汚不從裂其裳服體被重創
尋自縊事聞康熙四十八年建坊旌表

王之瑛妻劉氏姜賊變氏挈姑子避之至河賊追及氏棄子弗顧獨扶姑濟姑得免難人以孝稱

崔克儉妻董氏年二十四夫亡事親撫幼守節五十八年壽八十二而卒

生員胡惟煦妻白氏年十九夫亡子明達甫歲立志撫孤壽九十二而終

車某妻吳氏年十七夫亡子雲旺甫三月撫孤守節歷六十五年壽八十二卒

生員王仕皓母高氏進士高志女夫坐事氏懼辱自縊
生員張徹妻馮氏于廷弼妻張氏張甲秀妻曹氏貢生
于廷勸妻王氏杜含瑞妻白氏侯化泣妻馬氏庠生
李呈泰妻梁氏生員何振祖妻張氏貢生王洽妻梁
氏同知梁紹素妻于氏王好謙妻張氏增生王忼超
妻于氏監生崔漸超妻于氏生員吳祚妻李氏張王
聘妻賀氏王自炳妻王氏以上俱守志節

寧鄉縣

明

生員李坤妻劉氏適坤半載坤死誓不欲生遂自縊

高聰妻杜氏正德間徇賊標掠被執義不受辱遂遇害

劉瑋妻曹氏年十九夫亡遺一女甘貧守志完節以終

生員衛君寵妻劉氏少寡守貞教子直指旌其門

劉進良妻任氏夫亡遺孤軀甫二歲食貧撫子孀居五

十八年壽八十六卒

武廷珮妻白氏夫亡遺一子荼苦操作勵節終身

王崇德妻田氏年二十崇德卒遺孤朝相甫一歲撫訓成立娶婦高氏未幾朝相亦故姑婦砥志守節當道旌之

生員劉有孚妻楊氏年二十夫故家貧無子苦志守節邑令旌之

生員王幹妻靳氏幹疾篤氏割股罔效卒姑武氏患瘡氏口吮之復為割股按院旌其門曰節孝

王楨妻楊氏有孝行逆闖亂闔邑驚怖楊櫛沐如平時

王戲曰汝從賊乎氏曰我豈從賊賊雖刃我我不懼也尋舉家被害賊掠楊扶馬上投地者再賊怒斷其左足楊罵益厲身罹七刃而死

生員楊燦妻王氏年二十五夫亡矢志守節撫幼子士俊成立

國朝

趙靖妻馮氏馮免糧之族孫女當日偶遇于道深林翁翳免糧遂起意私之氏性激烈相持搏擊將于免糧致

命焉蹂躪于天紅崖邊兩人失足墜崖底氏負傷垂斃免糧復以帶勒死之雍正元年旌表

生員王仁妻郭氏少寡守節撫幼子事翁姑姻黨無間言雍正四年疏請旌表

廩生李廷翼繼室劉氏年十七適李二十三而寡事病姑十餘載孝謹不怠撫前子昱有恩昱夫婦早卒遺子女幼氏胥撫成之守節三十二年雍正八年疏請旌表

庠生王球妻賀氏姜賊變球挈家奔竄轉徙無常所球
間語賀曰脫逢賊汝奈何氏曰死易事耳肯辱君耶
尋賊劉定國據寧邑叛球父子胥被害氏方居鄉山
問至從容出門牽裙蒙面投懸岩死

靳可榮妻郝氏被賊執挾持上馬反折投地罵曰賊奴
我清白婦豈汝從耶賊怒殺之

生員王傳舟妻杜氏年二十四夫亡苦節五十年而卒
邑令旌以扁月給米二斗

廩生王珽之妻劉氏王恭先妻王氏王欽妻靳氏以上
俱守志節

大同府

大同縣

晉

劉殷妻張宣子女宣子家富於財以女妻殷其妻怒曰
我女年始十四姿識如此何慮不得為公侯妃而遽
妻劉殷乎宣子曰非爾所及也誠其女曰劉殷至孝

冥感兼才識超世此人終當遠達為世名公汝其謹
事之張氏性亦婉順事祖姑王母以孝聞奉殷如君
父焉及王氏卒殷夫婦毀瘠幾至滅性時柩在殯而
西鄰失火風勢甚盛殷夫婦叩殯號哭火遂越燒東
家後二白鳩巢于庭樹自是名譽彌顯

北魏

叔孫俊妻桓氏俊以翊戴明元功遷衛將軍賜爵安成
公年二十八泰常元年卒明元親臨哀慟命其妻曰

夫生既共榮沒宜同穴能夠葬者可任意桓氏乃縊
遂合葬焉

樂部郎胡長命妻張氏者不知何許人也事姑王氏甚
謹太安中京師禁酒張以姑老且患私為醞之為有
司所糾王氏詣曹自首由己私釀張氏曰姑老抱患
張主家事姑不知釀主司不知所處平原王陸麗以
狀奏文成義而赦之

常山公主獻文帝女適東郡王陸昕之奉姑盧氏有孝

稱性不妬忌以昕之無子為納妾媵而皆育女昕之
卒盧氏悼念而亡喪葬無違禮神龜初與穆氏瑯琊
長公主並為女侍中公主有三女無男以昕之從子
子璋為後事公主盡禮丞相高陽王雍常曰常山妹
雖無男子以子璋為兒乃過自生矣天平中卒

上庸公主初封藍田高明婦人也甚有志操適中書監
陸子璋事姑常山公主盡禮生六子印駿香騫搏彥
師皆聰穎邢邵嘗謂人云藍田生玉固不差矣主教

訓諸子皆以義方六子動依禮度亦母氏之訓焉

和跋妻劉氏跋性好炫耀道武狩豺山刑之劉氏自殺
以從

北周

司馬消難妻高氏齊神武女消難在鄴極加敬禮入關
便相棄薄及赴州氏及三子在京氏言於文帝曰榮
陽公攜寵自隨必不顧妻子願防慮之及消難入陳
母子獲免

宋

畢又林繼妻祝氏又林僑觀城前妻子士安少好學祝
曰學必求良師乃與如宋又如鄭士安得楊璞韓丕
劉錫為友因僑鄭州舉進士知乾州以祝氏老願降
任就養改監汝州稻田務後任至同平章事

元

宋堅童妻班氏李安童妻胡氏早寡不忍獨生以死從
夫事聞悉命褒美

張思孝妻華氏善咏為貆高兵所執以不受辱見殺其婦劉氏乃僵壓姑尸大罵不已兵併殺之後家人殮其屍姑婦之手猶相持不釋劉有賦廷栢自況詩云羣卉枯落時挺節成孤秀既保歲寒心不在遐與壽明

張氏前後所百戶曾廣妻永樂二年廣守鴉兒崖陷敵中時張年二十有娠生子興十五襲父職娶方氏正統十四年興復從征陣亡方年二十無嗣守節同姑

俱享永年

張氏潞城安簡王侍婢識文字王薨誓死妃與諸姬慰諭之張曰妾雖婢事王有年寧忍王死而獨生乎自經於閣一府咸高其義歲時祭之

趙氏大同前衛指揮葉盛妻鎮守椿之繼母也年二十餘盛死矢守撫椿兄弟如己出容飾不修無事不輕出寢戶孀居歷四十餘年卒

劉墨妻馬氏年二十四而寡撫幼子事舅姑以慈孝聞

貞操彌老益著宣德間旌表

王玘妻吳氏玘卒年二十六奉舅姑無違禮教有遺孤
安領鄉薦官縣令守節六十餘年正統間旌表

齊景才妻焦氏年二十四夫亡撫子守節成化六年旌
表

張氏大同後衛諸葛仁妻適仁四年仁沒氏慟絕欲殉
不食數日死時年二十五歲仁家三世孀居建有世
節堂焉

衛軍仲海妻董氏年二十餘夫亡三子胥幼訓誨成立
皆有操行長子能承役有智謀以功陞指揮

前衛高清妻王氏少寡姑病目雙瞽氏以舌舐之兩目
復明舅姑卒號泣毀形士夫競為孝德傳詩詞以頌
揚之

儀衛總旗武通妻郝氏年二十一夫亡撫藐孤成立孀
居六十年以壽終嘉靖間旌表

李添福妻衛氏年二十四夫亡遺子二長安方六歲次

寧在襁褓父母憐其少諷改適衛嚴拒之隆慶二年
巡按奏旌後安以參贊機務給冠帶寧以定款積功
官洮岷副總兵諸孫咸授指揮懷信歷官都督封氏
太夫人壽躋九十卒

都督同知林椿妻宋氏嘉靖庚戌椿戰沒氏年二十五
居喪哀毀捐簪珥營祭葬督課二子克繼先業鳳舉
任參將鳳騰任朔州守備萬厯間巡按奏旌

王氏潞城府輔國將軍俊榛繼妻俊榛好施祿入常不

贈王恒以奩資佐之俊椿卒王年二十餘會歲荒家
無長物力女紅以襄賓事撫孤充燿有成萬厯庚戌
巡撫奏聞褒贈夫人樹綽旌之

監生李貞妻王氏年二十五夫亡遺一女矢志節母
孀兄夭幼姪纔弱齡氏迎母同居生卒盡禮撫姪成
為娶婦以繼王後鄉黨賢之

李懷安妻王氏年十六歸李越七年而寡矢死守志貧
苦終身萬厯丁未詔旌

朱充堞妻郝氏封淑人孀姑曹氏性嚴重好潔有心疾
展轉需人非氏不愜氏須臾不離者垂四十餘年跪
伏進膳積久手足幾不能屈伸曹氏曰吾死何以報
汝願汝有婦亦以事我者事汝耳其後婦許氏事郝
盡孝果如曹氏言雲人傳為美談

輔國將軍朱充剗妻張氏年十九適充剗逾年充剗卒
守節四十年育孤有成萬厯丁未詔旌

馬恒妻陳氏年二十一夫亡守節四十餘年奉詔旌表

丁淮妻梁氏早孀撫子世臣娶王氏年二十五世臣疾謂王曰母孀子幼皆若責也氏領之矢志事育不負遺言當事旌其門曰雙節

朱成珮妻劉氏成珮毆殺宗人繫獄論死詔自盡氏先期詣禁所與夫訣曰早晚旨將下妾此後不復來視君也歸即自縊後二日成珮方死撫按咸勒石表其墓朱俊樞妻王氏廟見三載不孕為夫納妾陳氏陳舉子氏以封號讓之未幾夫與陳相繼歿撫子甫成尋亦

亡氏與子婦阮氏共砥節以終

典膳石銘妻馬氏銘齏于廣陵娶氏生子二方在抱銘
轉遊長蘆卒客邸族人盡括其遺貲令氏他適氏涕
泣不從族人舁柩返不與氏俱氏乃治裝攜二孤歷數
千里奔雲中苦守志行畢世不渝

項善妻阮氏知府阮宗道女年二十三夫亡撫子子復
天食貧孤苦志行彌堅何忠愍公以瓜葛誼雅其節
捐俸贍養巡按梁請旌

陳維垣妻焦氏維垣與錢氏私圖逐氏而娶錢氏性賢
淑不妬忌處之蔑如顧不與夫昵將寂居以終老維
垣狂暴卒不釋竟縊其頸而死死之日猶執爨供姑
鄉黨聞之咸頌其賢而泣下督學表其墓曰孝婦

前衛張孝妻邊氏子國琦妻王氏俱年二十七而寡婦
姑苦志終始不渝邊壽九十有七王壽六十有九人
稱雲中雙節

朱充鰥妻石氏年三十一夫亡家貧未膺封典勸嫁者

踵至氏矢死鬻指撫孤孤成甫娶未幾子婦相繼夭
撫孫芝田成立業醫有聲疏請於朝獲繼祖封詔旌
氏之貞節

丁倉妻祁氏年二十二夫亡氏矢志事育荼蘼終身督
學胡題請賜坊旌表

朱廷埃繼妻董氏無出妾郭氏生子一夫卒郭氏求去
氏曰若去孤誰與撫乃慰勉再三甘心共守歷三十
餘年卒

陝西都司宋定妻劉氏夫亡矢守有鄰郡宦族謀娶之
遣媒道意且曰適我子之功名可得也氏聞怒叱曰
賊將陷我於不義餌以國家名器上負君恩下慚名
教言之寧不汗顏聲色胥厲媒惶恐不敢復語守節
數十年會闖破太原賊勢孔亟謂其子曰我年已七
十死固晚矣又奚忍見此亂離耶絕粒七日而死

朱興泉妻金氏嫁甫五月興泉卒氏年十六有遺娠越
七月生子嗣延撫成會流寇犯境母子避難金城嗣

延古耕代養金城名士半出其門孫曾世繼書香列
明經人謂苦節之報云

監生王璿繼妻方氏少寡無出庶子甫四歲撫如己出
闖寇陷城氏哭拜璿柩前引刀自刎死

何大本妻武氏忠愍公子婦也闖賊陷城大本遇害氏
聞攜子婦甯氏同投繯死忠孝節義萃於一門云

張亨妻劉氏前衛喬恒妻張氏指揮林勝妻董氏生員
傅江妻常氏溫景清妻王氏知縣張伯達繼妻劉氏

側室姚氏施達妻羅氏高伯枝妻李氏指揮陳棟妻
李氏朱廷雛妻張氏武彥爵妻劉氏千戶鄒圃妻郭
氏溫習詩妻周氏杜寶妻楊氏永平同知任服休繼
妻杜氏石自祿妻朱氏何養節妻朱氏生員顧茂林
妻朱氏監生王宗伊妻鄭氏董天緒妻明氏生員任
重妻朱氏輔國將軍朱成鐮妻郭氏副將沈繼先妻
李氏韓粟妻張氏朱廷埏妻張氏朱廷埏妻胡氏朱
充燠妻阮氏生員郭之光妻李氏監生李先春繼妻

徐氏武舉任服德妻張氏生員溫經妻岳氏武仲義
妻郭氏朱充烜妻毛氏朱俊楹妻何氏中書馬呈德
繼妻王氏朱廷玟妻李氏李亨德妻朱氏舉人鄧應
元妻陳氏生員賀廷選繼妻朱氏生員劉懿謨妻陸
氏何浩繼妻吳氏盧仲文妻李氏生員鄧希孟妻張
氏以上俱守志節

國朝

王氏廉州守備高毓秀妻年十七歸高隨任粵東閱十

載毓秀罷官回籍以疾卒於湖州客邸氏慟絕而甦
歸旅櫬營窆撫未歲子尚志成名秉鐸襄陵苦節
三十三年康熙四十五年建坊旌表

何宗武妻王氏年二十五夫亡侍舅疾唯謹人稱其孝
訓二子列庠壽六十四卒雍正八年疏請旌表

楊月斗妻梁氏生有殊姿月斗叔楊慶漁其色窺月斗
出外潛入逼凌之梁大聲以拒慶遁踰月慶持刀往
梁力拒如前慶怒拔刀擊其右臂不從刃其左股者

三又不屈乃斫其右乳而死事聞論慶如律康熙五十七年建坊旌表

弁丁陳慧妻王氏年二十夫亡貧無以殮號慟感道路鄉黨競為之助既免喪父母憐其苦令他適氏誓不從嫠居二十八年茹荼集蓼處人所不堪見者哀之王之雲妻楊氏應州楊威女幼失恃天性至孝父鍾愛之及笄歸王以賢德聞會姜瓖變時之雲與長子逢春外出惟仲季二子在側楊囑曰吾家世篤忠義我

何忍貪生致辱賊人手兒輩無偕死以存王氏後語
畢躍入庭院井季子逢慶牽衣號泣從之其女已適
人聞母死狀亦自經後仲子逢泰訪父數千里卒奉
歸孝養郡守葉九思嘉其一門節孝為之傳

常炳妻朱氏姜瓖變炳與父志強叔志旺胥被繫脅之
使入其黨不從志旺遇害志強父子乃見囚朱見其
不返疑翁與夫之及于難也慷慨激烈自經而死時
氏年十有八歲

劉寶銀妻王氏年二十八而寡家貧縫紉資事畜苦節
五十年

貢生何士璋妻焦氏事舅姑克盡孝道姑抱沈疴不能
動履氏負之起臥積勞成疾至嘔血侍奉不少輟凡
僕婢掩鼻望而却走者氏皆躬執其役姑歿毀瘠逾
常翁年幾八旬事之一如其姑歲時祭享必誠必敬
士民咸頌其孝

霍鳳妻趙氏高永祿妻董氏張承業妻蘇氏生員胡孕

芳妻朱氏朱龍岩妻王氏生員何宗武妻王氏彭國
瓚妻劉氏仲明倫妻古氏王繼業妻劉氏生員祁鴻
妻古氏雷壘妻王氏生員傅良桂妻侯氏曹旺妻吳
氏生員宋芝池妻衛氏劉大捷妻賀氏秦芝妻王氏
武鳳翔妻梁氏聶顯揚妻龔氏李模妻閻氏喬佳選
妻韓氏以上俱守志節

懷仁縣

明

劉真妻韓氏年二十五夫亡家貧力女紅育子景春守節三十餘年成化七年旌表

李思鑑妻田氏鑑亡氏年二十七守節育子夔成化十年旌表

馬雲昇妻孫氏雲昇就試不售忿而自經孫痛悼不欲生絕粒旬日死

生員任祐妻楊氏祐與人戲悞被傷而死遺一子在抱楊理於有司得直遂沐浴更衣七日不食而死

苑洪妻邊氏年二十餘而寡食貧撫孤洪母亦早孀以節聞嘉靖間有司旌之曰姑婦雙節

郭天瑞妻苑氏年十九夫亡生子甫九月孀居六十年撫子成人

監生郭鏜妻王氏為邑富室女年十九而寡嫁時羅綺屏勿御勁節撫孤歷四十餘年卒

生員魏正誼妻鄧氏年二十五夫亡矢守奉姑侍疾尤謹撫四子中興等咸列庠食餼萬厯間奏請建坊旌表

生員馬應麟妻李氏年二十六而寡子進甫六歲困苦
守志初終一致有司旌其門

苑尚友妻魏氏少寡子幼堅守不回二子顯穎俱有聲
庠序天啟間奉詔旌表

王爾揚妻朱氏性端嚴明大義色養姑嫜無間尤好施
濟六親胥恃賴之崇禎間以孝賢旌闔閭變縊死中堂
生員蘇周謨繼妻朱氏無子納妾田氏生子甫三歲夫
亡氏誓守撫孤族人百計奪之勵志彌堅有司旌其

門

國朝

阮氏年二十六夫亡以節自誓撫幼子成立康熙三十
六年盧令詳請旌表

劉連妻楊氏夫亡年二十餘孀居孤苦艱難萬狀撫三
子皆成康熙四十年建坊旌表

李銳妻楊氏年二十六夫亡養親育子終身不飾容不
面人康熙四十年旌表

生員岳毓瑾妻張氏年二十夫亡撫遺腹子國柱食貧
守志國柱尋亡妻陳氏亦以孀節聞有司扁其門曰
一門雙節

王男子妻劉氏里推色秀家貧有老姑夫不能養婦勸
薪磴延日會歲大饑有豪族鈎結奸賈貨沒饑人女
子劉度家不免從容謂其夫曰老姑穉子不耐枵腹
旦暮將俱死俱死無益妾數被來者購以多金金誠
得多家可無死矣君第送妾於郊金既全妾得以身

完男子計無復出遂忍而許之畫定夫婦中夜預相
訣明日賈兒如其許來購既成王男子如劉言送之
郊賈兒防有他令男子復護出界行四日舍於天成
賈兒度無事乃鞭逐男子匿外舍賈兒盛酒易服若
將漁者婦詭曰吾夫不能保吾軀以至此聞且依依
私匿于外何為者是非痛言之弗肯去去則可以成
吾新好矣賈兒以為然行酒酣縱不知所為婦乃出
以賈意呼示其夫遽引簪刺喉而卒自是賈者星散

道路俱轟稱饑婦為奇節云郭傳芳為之傳

生員王道行妻崔氏少寡矢守孝姑訓子守節五十餘年三子胥克成名氏膺封典

生員郝贊妻王氏生員管應圖妻夏氏生員王汴妻魏氏魏秉懿妻王氏夏日健妻管氏拔貢魏垂遠妻于氏楊潤妻齊氏以上俱守志節

山陰縣

元

馮氏名淑安字靜居大名宦家女山陰尹山東李如忠
繼妻如忠初娶蒙古氏生子任數月而卒乃繼娶氏
大德五年如忠病篤重為氏慮氏截髮矢節如忠死
後兩月遺腹生子伏李氏及蒙古之族聞如忠沒有
遺財相率來山陰馮氏方病乘間盡取其貲及子任
以去氏不與校一室蕭然惟餘如忠蒙古氏之柩而
已朝夕哭泣悲動四隣久之鬻衣權厝二柩于戟山
下攜子廬墓側時年始二十羸形苦節為女師以自

給父母來視之憐其孤苦諷改適氏抓面流血不肯從居二十年卒護喪歸葬汶上齊魯聞之流涕

明

張天叙妻賀氏有女年十五寇入母子胥被掠賀慮見辱潛取刀與女自殺敵人相視錯愕

王謨妻郭氏嘉靖間寇至郭與村婦俱走匿南山寇大索驅之郭厲言曰吾良家子豈為異類所辱耶乃舉袂障面投崖而死

米貞妻周氏年十六適米生子獻可年十九貞亡氏美而艾里人爭欲得之周毀容矢節孀居四十餘年有司旌之

千戶陳上策妻郭氏宦家女及笄歸策婉順有婦德策客死白登郭絕粒三日既殮縊棺側宣大巡按湯銘其烈奏旌

生員李朮妻王氏年十九朮亡誓死不易孀帷三十一年詔旌

張伊智妻韓氏年二十歲夫亡韜髮減容誓不再適邑令旌其門

生員郭炳然妻王氏少寡冰蘖堅操滄瀾瘁養巡按旌其閭

儒官尤春妻楊氏夫亡家徒四壁苦節五十餘年課子宜顯成名當事咸表其節

生員王洵初妻劉氏年二十夫亡遺孤在襁褓父母欲嫁之齧指矢志撫孤成立巡按奏請旌表

總兵宋偉妻邊氏闖賊入城據其室殺偉氏不為屈膝
厲聲大罵賊加以炮烙兩乳焦爛罵猶不已賊稱烈
而止其刑

宋佳蔭妻朱氏總兵宋偉之子婦也闖陷城被執氏指
堂隅給之曰有藏金在賊爭往掘取氏急走窖中以
土覆身解帶自縊時年二十有六

國朝

廩生郭隆繼妻許氏年二十而寡族人利其產百計撓

之外禦強族內撫藐孤憂勞幾二十年子熊祥鳳祥
俱克成立壽七十餘卒

生員王遵智妻宋氏年十八夫亡撫孤秉彝入泮葬亡
育孫守節五十二年卒年七十

生員王遵猷妻郭氏年二十夫亡家徒四壁事育盡瘁
苦節五十餘年

李知新妻全氏廩生賈永昇妻李氏賈永興妻王氏以
上俱守志節

應州

遼

邢簡妻陳氏營州人父陞五代時累官司徒陳氏甫笄涉通經義覽詩賦輒能誦尤好吟咏時以女秀才名之年二十歸簡孝舅姑閨門和睦親黨推重有六子陳氏親教以經後二子抱璞抱質皆以賢位宰相統和十二年卒睿聖皇后聞之嗟悼贈魯國夫人刻石以表其行及遷祔遣使以祭論者謂貞靜柔順婦道

母儀始終無歎云

明

施達妻羅氏達從征没于陣氏年二十七守節三十八年奉詔旌表

施海妻徐氏年二十三夫亡越七月遺娠生子玉柑撫育有成孀居四十九年卒成化間奉詔旌表

李榮妻楊氏隆年典史楊杲女年二十一夫亡子未期撫孤守節歷五十二年卒

進士董官妻李氏孀居四十載未嘗一履里門撫夫弟
董宇成名以節壽終

兵部主事霍希夔妻李氏少寡撫幼子地成立年六十
卒

千戶王禹道妻李氏少寡守志撫遺腹子成襲祖職巡
按林旌之

生員霍希陶妻穆氏孀居三十餘年撫子野食餽郡庠
巡按旌之

賈雲衝妻劉氏年二十五夫亡苦志育孤孀居五十五年巡按旌其門

生員霍恩妻張氏年二十六夫亡艱苦萬狀節操彌堅卒年七十有三

田中監妻王氏少寡守節撫孤題請旌表

楊烈女州民楊儒女年十四闖寇陷城隨母匿木塔複板內賊索得之掠其母去女不從從塔墜地死

劉標妻朱氏生員趙采妻劉氏盧登文妻李氏劉永盛

妻徐氏劉承順妻尚氏以上俱守志節

國朝

監生鄭嗣堯妻楊氏年十七適鄭越二年生子宁甫九
日夫卒矢志守節備歷艱苦不易其操壽七十有二
子宁領鄉薦

生員馬上登妻司氏懷仁庠生司瑞女年二十七夫沒
子三俱幼氏苦節教子六十年壽登大耋卒

胡氏胡登女孫適州人曹姓者曹遊蕩不事生業以身

投旗挈胡偕行胡泣與兄訣曰我家傳清白不忍辱
身為奴今日之事一死而已遂自縊

鄭逢泰妻郭氏田生蒞妻姚氏夫亡俱守志節

渾源州

元

渾源知州劉仲亨妻田氏子彬甫七歲仲亨卒於官氏
年二十有五悲慟投繯死事聞至正間詔旌

明

張謙妻孫氏年二十二夫亡子文瑞未期撫訓成立壽
六十有二弘治間奏旌

王士能妻李氏生子瑞未週夫卒矢死不二年饑摘蒿
實和米麴食之歷困苦無變志卒年八十有四

生員李開妻靖氏開病篤謂氏曰吾不幸早死重閨弱
息累汝為之氏涕泣受命開沒織紵供甘旨佐子績
學成俊士部使者表其門

張鵬妻李氏鵬歿矢志從一茹苦終身子五列庠者三

俱登仕籍崇禎三年事聞旌其門

靈邱縣

唐

高氏飛狐縣古元應妻

新唐書作飛狐令

則天時冒頓攻飛狐

高氏帥衆固守虜不能拔乃引去詔封徇忠縣君

明

王彥卿妻李氏年二十七夫沒子甫五歲食貧守志洪

武十六年有司奏旌

縣志作弘治

張文德妻劉氏年二十五文德沒立志撫孤清白無玷
洪武十六年詔旌

劉綸妻王氏年二十七而寡菽水承歡課諸孤力學胥
列庠序年六十卒

李林鳳妻趙氏年少夫亡立志不二苦節三十九年
張侍郎俊子婦某氏少寡誓不再醮慮有撓其志者乃
髡髮為尼別構斗室寂居終老

王永卿妻李氏年二十三夫亡孤幼家計零落就食於

叔祖王學家學亦貧窶不能兼給與族姓謀嫁之氏
揮刀斷髮族衆驚愧而退撫子完節以終

庠生劉光鵠妻李氏年十九夫故遺腹生子甫入泮早
折復撫孫成立年七十餘卒當事咸旌其閭

太學生劉調元妻支氏崇禎七年兵陷邑城子女俘掠
甚衆氏知不免墮井死

國朝

孫邦奧妻趙氏年二十三夫亡子暉甫三歲趙誓不再

適課子學成以明經顯守節五十五年壽七十八歲
康熙四十六年建坊旌表

廣靈縣

明

劉大海妻梁氏年二十八夫亡遺幼子儒氏撫孤守志
非祭掃不踰戶閭嘉靖間詔旌

監生譚繼龍妻趙氏年二十四夫亡子香在襁褓砥志
育孤萬厯間有司旌其門

董繼妻王氏年少夫亡撫遺孤自修成立以節壽終

任朝陽妻郭氏年二十餘夫亡有遺腹每夕焚香祝曰
願天賜一男以延夫祀已果得男撫孤矢節乃姑愛
次子利其貧逼改適氏誓死不從姑每以非禮役使
之凌虐萬狀郭事姑彌謹甘受無怨言後子鼎年七
十氏始卒

國朝

王前陳妻李氏年二十夫亡子紹祖未彌月氏茹苦守

志事親撫子歷三十五年人無間言

生員梁士彥妻周氏少寡子幼翁姑勸之嫁氏砥節撫子弱冠列庠序鄉黨賢之

梁士達妻宋氏年二十五夫亡孀居五十餘年撫子有成

魏氏大同司馬魏某女也字廣靈劉令孫德溥後魏陞任南滇女隨去劉父子咸卒於署德溥以官逋繫圜圍魏聞齒姻事微有沮色女言于母曰業經許字貧

富遠近命也何計焉魏嘉其志趨母送廣邑完婚氏
荆布自甘克脩閭職雖在患難中夫婦敬禮如賓賢
淑嘖嘖人口踰三載以產難逝闔邑悲悼氏讀書能
詩有冰鑑閭閻中三十詠

任匪小妻譚氏生員梁六德妻宋氏姚生廣妻郭氏以
上俱守志節

廣昌縣

明

千戶仲儒妻劉氏年二十五儒疾劉躬湯藥百晝夜帶
不解比卒求死以殉所親防視弗獲遂一日紿之曰
死誠無益第吾感傷至此為市一瓜來稍解燥煩吾
精爽即如初也所親信之市瓜至劉已縊儒柩側有
司奏旌

鄒天福妻戴氏年二十七夫亡苦節四十餘年教子補
郡弟子員

張廷諫妻彭氏于歸歲餘廷諫亡氏年方十六踰五月

遺腹生子守志撫孤終身如一

張聰妻霍氏年二十歲夫亡孀居五十餘年撫子雲業
儒成立

吳安妻郭氏安任北京倉官病卒氏扶柩抵里將殯縊
於柩旁遠近聞而悲之

都司孫獻策妻張氏少孀節有完操奉詔建坊旌表
庠生董守德妻仲氏年二十五夫亡撫二歲孤良童三
十年死於賊復撫六歲孫成之卒年八十

張守孝妻傅氏夫亡並列二棺誓與同穴直指旌之

吳喬妻鞠氏姑患臂痛百治不愈氏籲天願捨臂代姑
姑旋愈至夜焚香祝畢引刀自斷一臂以完前願鄉
里稱孝婦云

鎮撫劉經妻楊氏鄒臣妻高氏劉演妻高氏百戶呂璋
妻孫氏馬騰妻張氏百戶吳經妻張氏錦衣校尉蕭
奇能妻鄒氏通判蕭棟妻劉氏賈可教妻劉氏生員
趙一疆妻武氏賈懷忠妻解氏劉良法妻劉氏庠生

李學謨妻謝氏劉勉妻亢氏庠生趙雲霞妻張氏廩
生李毓秀妻楊氏生員張允升妻張氏生員劉棟材
妻張氏孫九齡妻鄧氏生員周時鼎母賈氏驛丞張
介妻安氏以上俱守志節

國朝

廩生李好生妻侯氏少寡遺幼子二長失明次在抱艱
難困苦歷四十餘年卒

李氏封宜人贈按察司僉事徐詰妻也詰殉難子恭癰

殤三女繼天宜人子身孤苦荼藥畢生學使黃叔琬
旌為忠節雙輝之門

生員徐鍾秀妻劉氏早寡教子以發游庠旋卒偕媳張
氏共凜冰操孫兆熊膺選拔學使旌其門

李色艷妻劉氏年二十三夫亡撫遺腹子苦節五十餘
年卒

李汝業妻祖氏生子數月汝業卒氏年少所親諷之嫁
不可撫子守志垂老而終

李文忠妻周氏武生趙完璧妻蘇氏生員王廷璧妻李氏生員伊先覺妻吳氏廩生李國屏妻陳氏樂清令李之實妻李氏徐圖遠妻趙氏安有福妻胡氏趙安妻陳氏生員王鏐妻李氏生員冀北豫妻馬氏李彥龍妻劉氏李思昇妻傅氏梁樹茂妻范氏廩生趙學普妻劉氏張茂隆妻趙氏生員張琪母顧氏以上俱守志節

陽高縣

明

曹宣妻李氏生子甫三歲夫亡截髮矢志撫子成立年八十四卒布政白行順為之撰記

舍人丁淮妻黃氏年二十三夫亡守節三十餘年壽六十有二

生員吳獻忠妻任氏年十九夫亡孝事老翁撫遺腹子之璧成立鄉黨賢之

指揮僉事張所蘊妻高氏早寡無子撫侄熙為嗣冰霜

勵操壽九十有一卒

國朝

生員吳振宗繼妻沈氏年二十夫亡無出撫前妻子正
生娶婦列庠尋卒遺幼孫二鞠育有成歷五十餘年
終

王繩祖妻謝氏少寡子鎮國方七歲家甚窘事姑不遺
餘力每奉甘旨給子使出不令分姑食姑性嚴急少
不遂輒詬詈嘗至披面啣臂含忍無怨色當事旌之

秦世臣妻崔氏世臣淫佚不軌于正崔常切諫之不聽
繼以哭且遭撻辱踰年坐罪發遣崔恨適匪人中途
必受侮懷刃入廁先刃嬰兒後自斷喉而死

蘇大彰妻張氏少寡撫子旣而翁姑沒夫弟妹俱幼氏
撫養尤恩守節四十年壽六十三而卒

張聖訓妻郝氏張文錦妻閻氏席定國妻孟氏王福珍
妻吳氏李綦妻康氏武魁妻趙氏孫懋績妻齊氏郭
珍妻王氏張文萬妻李氏郝鞏妻吉氏以上俱守

志節

天鎮縣

明

雷世雄妻靳氏年二十五而寡子宸六歲家貧日食不飽無怨苦聲守節三十餘年巡按旌之

弘治己酉舉人周完妻李氏年十八夫亡遺孤魯方一歲氏矢節訓子由歲貢任朝城令山東巡撫嘉其苦節疏請旌表壽八十七終

于堯妻朱氏年二十夫亡遺孤鳳儀甫四歲教子成名
官參將封太宜人壽七十四終

國朝

谷發妻王氏發從弟旺少孤從母轉適母亡歸依發傭
力自食未幾發病故旺思妻其嫂將僦居他所直言
致之氏泣且詈鄰婦咸為勸解既而旺不及待潛遣
幼姪出挺然入犯氏峻拒旺怒持挺擊之推仆鍋斧
其額立時死康熙四十七年事聞旺抵氏死

詔旌

生員丁培初妻趙氏年二十四夫故勤勞奉姑教子旺
異業儒充邑弟子員雍正四年建坊旌表

參將羅光大繼妻姚氏光大卒于任無子氏恐死治喪
事扶柩歸里窆期前一日更衣自縊棺衾胥預備時
年二十有七

于構基妻安氏年二十三夫亡子公勦甫二歲守節教
子孀居五十一年

山西通志

卷之二十一

二十一

山西通志卷一百五十三